

Adenan jumpa PM hari ini
Free Malaysia Today
Julai 4, 2016

Antara yang dibincangkan ialah penurunan kuasa, Laporan Jawatankuasa Antara Kerajaan, Perjanjian Malaysia 1963, Akta Malaysia dan Laporan Suruhanjaya Cobbold.

PUTRAJAYA: Ketua Menteri Sarawak Tan Sri Adenan Satem hari ini bertemu Perdana Menteri Datuk Seri Najib Razak di Pejabat Perdana Menteri di sini.

Kenderaan rasmi yang membawa Adenan dilihat memasuki bangunan Perdana Putra, yang menempatkan Pejabat Perdana Menteri, pada 9.05 pagi untuk pertemuan itu yang dijadualkan pada 9.30 pagi.

Kenderaan yang dinaiki Adenan kelihatan keluar dari perkarangan Bangunan Perdana Putra pada 10.45 pagi.

Beliau hanya melambai ke arah media yang menunggu sejak 8.30 pagi untuk mendapatkan maklum balas beliau mengenai pertemuan itu.

Pejabat Ketua Menteri ketika dihubungi berkata kenyataan rasmi berhubung pertemuan itu mungkin akan dikeluarkan dalam masa terdekat.

Menurut kenyataan yang dikeluarkan Pejabat Ketua Menteri semalam, perkara yang dibincangkan pada pertemuan itu adalah mengenai penurunan kuasa, Laporan Jawatankuasa Antara Kerajaan (IGC) dan cadangan-cadangan, Perjanjian Malaysia 1963, Akta Malaysia dan Laporan Suruhanjaya Cobbold.

Menurut kenyataan itu lagi, Adenan juga menyerahkan dua memorandum kepada Najib mengenai pendirian kerajaan negeri berhubung perkara berkenaan.

Pada 21 Januari lalu, Adenan yang mengambil alih tampuk kepimpinan Sarawak daripada Tun Abdul Taib Mahmud sejak Februari 2014, menyenaraikan 13 perkara yang dipersetujui oleh kerajaan persekutuan dalam penurunan kuasa pentadbiran kepada kerajaan negeri.

Dalam fasa pertama rundingan penurunan kuasa adalah antara kerajaan negeri Sarawak dan kerajaan persekutuan dengan rundingan fasa kedua akan menyentuh tentang hak negeri ini (pencerobohan persekutuan terhadap kuasa negeri), dan fasa ketiga mengenai permohonan royalti minyak dan gas.

Pada 26 Jun, Menteri di Jabatan Perdana Menteri Nancy Shukri berkata sebuah jawatankuasa teknikal mengenai penurunan kuasa ditubuhkan selepas mesyuarat peringkat tinggi pertama pada 13 Jun lepas.

Jawatankuasa itu mengandungi wakil yang dicalonkan kerajaan negeri Sarawak dan Sabah bersama-sama wakil kerajaan persekutuan dan sejarawan dari dua negeri tersebut.

Sebelum itu, Kabinet melantik Nancy dan Menteri Luar Datuk Seri Anifah Aman untuk meneruskan rundingan fasa kedua penurunan kuasa atas hak-hak di bawah perlembagaan Perjanjian Malaysia 1963 bersama Jabatan Peguam Negara.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/07/04/adenan-jumpa-pm-hari-ini/>